



KENYATAAN MEDIA JABATAN PERIKANAN MALAYSIA

MAKLUM BALAS JABATAN PERIKANAN MALAYSIA (DOF) BERKAITAN “HASIL LAUT KITA DIDARATKAN DI NEGARA JIRAN’

1. Jabatan Perikanan Malaysia (DOF) ingin memberi maklumbalas mengenai kenyataan akhbar tempatan berkaitan “**Hasil Laut Kita Didaratkan Di Negara Jiran**”.
2. Isu utama adalah berlakunya **ketirisan sumber perikanan** melibatkan pendaratan hasil tangkapan di luar negara, pemindahan ikan di tengah laut dan juga pencerobohan vesel dari luar negara untuk mengambil sumber perikanan negara.
3. Penyelarasan penguatkuasaan maritim diketuai oleh APMM dan disokong oleh **Jabatan Perikanan Malaysia (DOF)** dan Pasukan Polis Marin. Penguatkuasaan terhadap pencerobohan kapal asing dijalankan oleh APMM manakala penguatkuasaan bagi kes tempatan yang biasanya melibatkan nelayan tradisional dikendalikan oleh DOF dan Polis Marin.
4. Dari tahun 2016 hingga kini, sebanyak **256 kes tangkapan bot asing** dengan nilai rampasan dianggarkan sebanyak RM180 juta telah dilaksanakan oleh pelbagai agensi penguatkuasa Negara dan DOF mencatatkan sebanyak 6 kes tangkapan bot asing. Sebanyak **2,199 kru nelayan bot asing** telah ditahan dalam tempoh tersebut dari pelbagai Negara seperti Indonesia, Vietnam dan Thailand.
5. Sejak 2016 hingga kini, melalui pelaporan DOF kepada APMM secara harian, sebanyak **433 kes melibatkan vesel ke luar perairan perikanan negara** tanpa kebenaran telah dikesan. 259 kes (60%) adalah dikesan ke Thailand, 168 kes (39%) lagi ke Vietnam dan 3 kes (1%) ke China dan Indonesia. Selain itu, terdapat 73 kes aktiviti menangkap ikan menggunakan pukut tunda dua bot atau bot ganding yang melibatkan 38 buah vesel juga telah dikesan

dengan menggunakan sistem VMS. Kesemua pemilik vesel telah dipanggil pada 27 April 2017 untuk diberikan amaran dan akujanji dan ada juga yang diambil tindakan gantung lesen.

6. DOF mengambil tindakan tegas dan berterusan dalam menangani isu ketirisan sumber tersebut. Bermula tahun 2011, program pemutihan vesel laut dalam telah dilaksanakan dan sehingga kini sebanyak **472 vesel telah dibatalkan lesen**. Tindakan ini diambil disebabkan terdapat vesel-vesel laut dalam yang melanggar Akta Perikanan 1985, syarat-syarat pelesenan dan ketirisan hasil tangkapan.
7. DOF juga telah mengambil tindakan dengan **memperketatkan syarat lesen**. Hanya vesel laut dalam yang memenuhi syarat pelesenan sahaja iaitu vesel hendaklah vesel asal, memenuhi syarat minimum pendaratan ikan tahunan (pukat tunda – 250 mt/tahun, pukat jerut- 350 mt/tahun dan rawai- 100 mt/tahun) dan keaktifan alat MTU hendaklah melebihi 80% setahun yang diluluskan pembaharuan lesen tahunan.
8. Bagi memastikan pengusaha vesel laut dalam mendaratkan ikan sepenuhnya di jeti pendaratan ikan di negara ini, DOF telah mengambil tindakan **memperkukuhkan sistem pendaratan ikan di pelabuhan** dengan melaksanakan (1) pilot projek pemasangan kamera litar tertutup (CCTV) di pangkalan LKIM Tok Bali, Kelantan dan juga (2) Projek Penggunaan Pas Keluar Masuk Vesel Laut Dalam di Pangkalan Pendaratan Ikan (SPVC2) di empat (4) buah pelabuhan iaitu Pelabuhan LKIM Tok Bali, Kelantan, Pelabuhan LKIM Kuantan, Pahang, Pelabuhan LKIM Kuala Perlis, Perlis dan Pelabuhan Bersepadu Tanjung Manis, Sarawak. Semua vesel laut dalam yang masuk ke pangkalan tersebut akan dipantau sepenuhnya. **Projek SPVC2 tersebut telah mula dilaksanakan pada 1 Mei 2017.**
9. Pemantauan ke atas vesel laut pantai (Zon A, B dan C) juga dibuat bagi memastikan pendaratan sumber perikanan dari subsektor laut pantai mencapai sasaran DAN. Sehubungan itu, bagi memastikan vesel pukat tunda Zon B mendaratkan ikan sepenuhnya di pangkalan yang telah ditetapkan dan juga menangani isu pencerobohan kawasan tangkapan, Jabatan telah mengambil tindakan dengan **memasang alat Automatic Identification System (AIS) keatas 2,630 buah vesel pukat tunda Zon B**. Sehingga kini sebanyak 1,116 buah vesel telah berjaya dipasang dengan alat berkenaan.

10. Selain itu, **menguatkan kerjasama serantau untuk membanteras penangkapan ikan secara haram (RPOA-IUU)** oleh ASEAN Sectoral Working Group on Fisheries and Regional Plan of Action (RPOA). Malaysia telah memohon negara-negara ASEAN dan ahli RPOA untuk menolak pendaratan mana-mana vesel penangkapan ikan dari negara Malaysia. Malaysia juga menggunakan platform bilateral dengan negara Vietnam dan Thailand bagi tujuan yang sama.
11. Pembangunan **tukun tiruan** juga dilaksanakan bagi menambah kepadatan dan meningkatkan stok sumber marin di samping memulih dan melindungi habitat marin yang musnah akibat aktiviti perikanan dan bencana alam.
12. Di Pantai Timur Malaysia yang terdiri dari Kelantan, Terengganu dan Pahang telah menarik jumlah pencerobohan yang tinggi kerana laut yang luas, masih kaya dengan kepelbagaian spesies ikan. Antaranya yang bernilai tinggi ialah sotong dan gamat. Kajian pentaksiran stok sumber perikanan di Malaysia yang dijalankan oleh pasukan penyelidik DOF mencatatkan nilai biomass bagi sumber dimersal, pelagik, tuna dan udang adalah sebanyak **1.8 juta tan metrik bernilai RM18.1 bilion**.
13. Pencerobohan nelayan asing ini memberi kesan negatif kerana salah satu kaedah popular yang diamalkan ialah mereka menggunakan kaedah menangkap ikan secara tunda ganding yang dikhuatiri bukan sahaja menjejaskan pendapatan nelayan tempatan kerana kerosakan peralatan seperti bubu dan unjam, tetapi juga menjadi punca kerosakan ekosistem terumbu karang, kima dan penyu turut ditangkap tanpa kawalan.
14. Dianggarkan sebanyak 980,000 tan metrik hasil laut negara yang bernilai antara RM3 bilion hingga RM6 bilion hilang setiap tahun akibat aktiviti pencerobohan nelayan asing. Dianggarkan bahawa, hanya 50% ikan yang ditangkap di perairan negara, didaratkan di Malaysia. Selebihnya yang ditangkap dari perairan EEZ Malaysia TIDAK dilaporkan (Unreported), bermakna berlaku pencerobohan oleh nelayan asing yang mencuri hasil laut negara.

15. Jabatan Perikanan Malaysia (DOF) menyeru semua pengusaha perikanan dan nelayan supaya memikul tanggung jawab bersama untuk sentiasa mematuhi syarat-syarat lesen, peraturan-peraturan perikanan di bawah Akta Perikanan 1985 bagi memastikan sumber perikanan yang mampan untuk menjamin sumber bekalan makanan pada masa akan datang.

16. Orang ramai khususnya para nelayan disaran agar menyalurkan maklumat-maklumat secara bertulis atau bergambar mengenai kegiatan yang menyalahi Akta Perikanan 1985 **secara telefon atau SMS hotline FISHCOM di talian 03-8880 5019 atau melaporkan kepada Pejabat Perikanan Daerah** yang berhampiran bagi tindakan susulan.

####

DATO' HAJI MUNIR BIN HAJI MOHD NAWI

Ketua Pengarah

Jabatan Perikanan Malaysia

03 November 2017 (Jumaat)